



3. januar 2011

Inatsisartut suleriaasianni § 37 naapertorlugu Naalakkersuisunut apeqqutit imaattut matumuuna saqqummiuppara:

Naalakkersuisunut apeqqut:

1951-imi kalaaliaqqat 22-it Danmark-imut aallartinneqarsimasut pillugit Naalakkersuisut suliamik ingerlatseqqinnissaminnut qanoq pilersaaruteqarpat? Suliarlu sumut killippa?
(Inatsisartuni ilaasorta, Doris Jakobsen Siumut)

Tunngavilersuut:

2009-mi Folketing-imi Lars-Emil Johansen-imut paarlattaallunga, Folketing ammaanersiormat oqalugiaatinni ilannguppakka 1951-imi kalaaliaqqat 22-it Danmarkimut aallarunneqarsimasut Qallunaat Naalagaaffiannit utoqqatserfigineqarnissaat Statsministerimit piumassuseqarfigineqarnersoq apeqquteqaatigalugu. Pakatsissutigisannilli akineqarpunga, Statsministerip utoqqatsernissaq pilersaarutiginnikkaa.

Tamatuma kingornatigut, tusagassiutinut qisuariaateqarpunga aammalu Statsministerimut allagaqarlunga kingornatigut Indenrigs- og Socialministerimut akissuteqarfigineqartunik. Allagaqaatinni nassuiaaquara, suna tunngavigalugu 50-60-kkunni qallunaajaqqat pinngitsaalisaallutik børnehjem-imut inissinneqarsimasut nakorsaatinillu misileraaffigineqarsimasut kisiisa Qallunaat Naalagaaffiata misissuiffigineqarnissaat aningaasaliiffiginiarneraat, kalaaliaqqallu assigusumik pineqarsimasut misissuiffigineqarnissaat aningaasaliiffigissallugu itigartillugu.

27. oktober 2009 Indenrigs- og Socialministeri allakkatigut akissuteqarpoq, kalaaliaqqat taamatut pineqarsimasut, qallunaajaqqanut børnehjem-imut inissinneqarsimasunut immikkoortilluinaqqullugit. Oqaatigalugulu kalaaliaqqat Danmarkimut aallarunneqarsimasut atuakkiortumit Tine Bryld-imit "I den bedste mening"-imi allaaserineqareersimasut, soorlulusooq imatut paasillugu atuakkiarineqareersimammat misissuiffigineqartariaqanngitsut aammalu pisoq pereermat oqalutuaannanngoreermallu suliaq qaqinneqaqqittariaqanngitsoq.

Apeqquteqaatit allallu tamakkua ingerlareermata Naalakkersuisut siulittaasuat tusagassiutitigut apersorneqarluni oqaaseqarpoq, misissuinissaq nunatta Danmarkillu akornanni ajornartorsiut oqaloqatigiissutigineqalersaartoq eqqaamasakkalu malillugit misissuineq ingerlanneqassasoq.

Tamatuma kingorna "I den bedste mening"-imi atuakkiortoq Tine Bryld naapippara ataatsimeeqatigalugulu. Taassuma siunnersuutigaa, misissuineq ingerlanneqarsinnaasoq annertusisamik tassa imatut paasillugu kalaaliaqqat 22-it taakkua pillugit aammalu allat kalaaliaqqat aallartinneqartarsimasut pillugit.

Taamaammat soqutigintutut isumaqarfigaara, Tine Bryld aammalu kalaallimik inatsisilerituutut ilisimatusartumik allamilluunniit peqateqarluni Namminersorlutillu Oqartussat peqatigalugit misissuineq annertusisaaq ingerlassinnaagaa, taassumami suliaq annertoq tassungarpiaq tunngasoq ingerlatereernikummagu.



SIUMUT INATSISARTUNI ILAASORTAAQ / LANDSTINGSMEDLEM

Taamatut isummersuuteqarlunga, Naalackersuisunut apeqquteqaatigissavara Naalackersuisut Siulittaasuata tusagassiutitigut suliap ingerlateqqinneqarnissaanik oqariartuuteqarnikuunera qanoq Naalackersuisunit maannamut piviusunngortinniarneqalersaarnersoq?